

FONGTIL Mobiliza Massa Husi Munisípiu Kontra Ministru Cárceres



Diretor Ezekutivu FONGTIL Daniel do Santos Carmo ko'alia ba jornalista sira hafoin partisipa iha aktividade manifestasun ne'ebe hala'o husi FUTL iha Area ministeriu Justisa nian , Tersa (4/8). Foto Tempo Timor

Tempotimor (Dili, 4 Agosto 2020) - Forum Organizasun Noun Governmental Timor-Leste (FONGTIL) fo orientasaun ba membru sira iha munisípiu 12 inklui Rejiaun Administrativa Oekusi-Ambenu (RAEOA), atu mobiliza massa kontra Ministru Justisa, Manuel Cárceres, relasiona alterasun kriminalizasaun Lei Difamasaun.

Diretór Ezekutivu FONGTIL, Daniel do Santos Carmo hatete, fó autorizasun ba membru sira hodi halo esplikasaun ba comunidade sira atu hamriik hamutuk kontra desizaun polítika Ministru Justisa.

Nia hatutan, Ministru Justisa kuandu la entende preokupasaun ne'e maka FONGTIL hamutuk ho estudante, inklui populasaun sei mantein halo manifestasaun to'o governu iha desizun ikus hapara lei ne'e.

"Ita hamriik hamutuk hodi kontra lei ne'e tanba ita hatene katak lei ne'e hamate liberdade povu hotu nian," dehan Daniel, ba jornalista sira hafoin partisipa iha atividade manifestasun, iha edificiu Ministériu Justisa, Tersa (4/8).

Molok ne'e, Membru Parlamentu Nasionál mós hola parte hodi kontra Lei Difamasaun ne'ebé prepara husi Ministériu Justisa.

Deputadu sira ne'e maka Antonio Verdial, Mariano Assanami Sabino, Duarte Nunes, Carmelita Monis inklui Eis-Presidente PN, Arão Noe Amaral. (*)